

- लोकसभा चुनाव रा दूजा दौर सारु आज अधिसूचना जारी करी ज्यी- राज्य री 13 सीटां सारु पर्चा दाखिल करण रो काम सुरु व्हयो।
- प्रदेश मांय लोकसभा चुनाव रा पहला दौर सारु भरी ज्या नामपाना री जांच मांय सात उम्मीदवारां रा पर्चा खारिज।
- राज्य मांय लोकसभा चुनाव सारु हाल ताई करीब 68 हजार बुजुर्ग अर दिव्यांगजन घर ऊं वोट देवण रो विकल्प चुण्यो।
- प्रदेश मांय काल ऊं नुवा पश्चिमी विक्षोभ रा असर ऊं मौसम मांय बदलाव रा आसार- केई ठौड़ां हल्की बारिश री संभावना।

000

प्रदेश मांय लोकसभा चुनाव रा दूजा दौर सारु आज अधिसूचना जारी कर दीरीजी। ई सागे ई राज्य री 13 सीटां टोंक-सवाईमाधोपुर, अजमेर, पाली, जोधपुर, बाड़मेर, जालौर, उदयपुर, बांसवाड़ा, चित्तौड़गढ़, राजसमंद, भीलवाड़ा, कोटा अर झालावाड़-बारां सारु पर्चा दाखिल करण रो काम सुरु व्हे ग्यो। बागीदौरा विधानसभा सीट माथे उपचुनाव सारु ई अधिसूचना जारी कर दीरीजी है, जठे लोकसभा चुनाव रा दूजा दौर रा चुणाव सागे ई उपचुनाव सारु 26 अप्रैल ने वोट पड़ेला। बाड़मेर सीट ऊं भारतीय जनता पार्टी रा उम्मीदवार कैलाश चौधरी आज पार्टी रा केई नेतावां री मौजूदगी मांय पर्चा दाखिल कीनो। जालौर सीट ऊं भाजपा रा उम्मीदवार महेन्द्र के चौधरी अर उदयपुर सीट ऊं भाजपा रा उम्मीदवार मन्नालाल रावत ई पर्चा दाखिल कीना। लोकसभा चुनाव रा दूजा दौर मांय 4 अप्रैल ताई पर्चा दाखिल कर्या जा सके है। 6 अप्रैल ने आं री जांच करी जावेला अर उम्मीदवार 6 अप्रैल ताई नाम पाछा लिया जा सकेला।

000

राज्य मांय लोकसभा चुनाव रा पैला दौर सारु दाखिल करी ज्या नाम पानां री आज जांच करी ज्यी। कुल 131 उम्मीदवारां कानी ऊं दाखिल करी ज्या पर्चा मांय ऊं सात उम्मीदवारां रा पर्चा खारिज कर दिया ज्यो। निर्वाचन विभाग री ओर ऊं मिळी जाणकारी रे मुजब चुरु, झुंझुनू अर जयपुर ऊं दो-दो जद के दौसा सीट सारु दाखिल करी ज्यो एक पर्चा खारिज करी ज्यो है। पर्चा री जांच मांय 124 उम्मीदवारां रा पर्चा सही मिल्या। ध्यानजोग है के पहला दौर रा तैत 12 लोकसभा सीटां माथे व्हेवण वाळा चुणाव सारु 131 उम्मीदवार 179 नामपाना दाखिल कीना है। पैला दौर रा चुणाव सारु पर्चा दाखिल करण वाळा उम्मीदवार 30 मार्च ताई नाम पाछा ले सके है। ई पाछे आं सीटां माथे चुणाव सारु उम्मीदवारां री लिस्ट री तस्वीर साफ व्हे सकेला। राज्य मांय चुणाव रा पहला दौर मांय 19 अप्रैल ने वोट पड़ेला।

000

लोकसभा चुनाव सारु कांग्रेस पार्टी रो घोषणा-पत्र ई दफा जयपुर ऊं जारी कर्यो जावेला। कांग्रेस रा राष्ट्रीय अध्यक्ष मल्लिकार्जुन खड़गे, पार्टी री पैली वाळी अध्यक्ष सोनिया गांधी अर पैली वाळा अध्यक्ष राहुल गांधी 6 अप्रैल ने जयपुर मांय पार्टी रो घोषणा-पत्र जारी करेला। आं तीन ई नेतावां रो जयपुर मांय चुनावी सभा ने संबोधित करण रो ई कार्यक्रम है। सोनिया गांधी री सभा री तैयारियां रा बारा मांय आज जयपुर मांय जयपुर समेत छह लोकसभा सीटां ऊं जुड़्या आला नेतावां री मीटिंग पाछे कांग्रेस रा प्रदेश अध्यक्ष गोविंद सिंह डोटासरा आ जाणकारी दीनी। ई मीटिंग मांय पार्टी रा प्रदेश प्रभारी सुखजिंदर सिंह रंधावा, राज्य रा पैली वाळा मुख्यमंत्री अशोक गहलोत अर कांग्रेस रा प्रदेश अध्यक्ष गोविंद सिंह डोटासरा चुनाव ऊं जुड़ी तैयारियां रा बारा मांय चर्चा कीनी। मीटिंग पाछे पैली वाळा मुख्यमंत्री अशोक गहलोत कह्यो के जयपुर ऊं पार्टी रो घोषणा-पत्र जारी कर्यो जावणो ऐतिहासिक बात व्हेला।

000

आवता दिनां व्हेवण वाळा लोकसभा चुनाव मांय राज्य मांय हाल ताई करीब 68 हजार बुजुर्ग अर दिव्यांगजन घर ऊं वोट देवण सारु अर्जी दीनी है। राज्य रा मुख्य निर्वाचन अधिकारी प्रवीण गुप्ता बतायो के प्रदेश मांय लारला साल रा आखिर मांय व्ह्या विधानसभा चुनाव रे दौरान 61 हजार ऊं बत्ता पात्र मतदाता घर ऊं वोट देवण सारु नाम मंडाया हा, जद के लोकसभा चुनाव सारु आ तादाद 68 हजार ने पार कर ग्यी है, जद के चुणाव रा दूजा दौर सारु नाम मंडावण रो काम हाल ई चाल

रह्यो है, जद के चुणाव रा पहला दौर मांय घर ऊं वोट देवण सारु नाम मंडावण रो काम पूरो व्हे ग्यो है। ई चुणाव मांय 51 हजार ऊं बत्ता बुजुर्ग अर 16 हजार 735 दिव्यांग मतदाता घर ऊं वोट देवण सारु नाम मंडाया है। गुप्ता बतायो के लोकसभा चुणाव रा राज्य मांय पैला दौर मांय 5 ऊं 14 अप्रैल ताई घर ऊं वोट देवण री प्रक्रिया चालेला। दूजा दौर मांय घर ऊं वोट देवण रो काम 14 ऊं 21 अप्रैल ताई चालेला।

000

आवता लोकसभा चुनाव मांय राज्य मांय बत्ता ऊं बत्ता मतदातावां कानी ऊं वोट देवणो तैय करण रा मकसद ऊं नुवा-नुवा जतन कर्या जा रह्या है। अलवर जिला मांय एक अप्रैल ऊं ऑनलाईन होड़ राख्यी जावेला, जिण मांय जीतण वाळां ने जिला कलेक्टर सागे कौफी पीवण रो मौको मिलेला। वां ने सर्टिफिकेट दे र ई नवाजा जावेला। झालावाड़ मांय वोट देवण बाबत् जाग जगावण सारु राजस्थान दिवस रे मौके स्वीप अभियान रा तहत न्यारा-न्यारा कार्यक्रम राख्या जावेला।

000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है जयपुर जिला रा बस्सी रा श्रोता रो संदेश।

-----

000

स्वच्छ सर्वेक्षण-2024 रा तैत जयपुर शहर मांय साफ़-सफ़ाई और बधावण सारु नगर निगम जयपुर हैरिटेज न्यारा-न्यारा गैर-सरकारी संगठनां, व्यापार मंडलां, कारोबारियां अर शहर रा रेहवासियां री राय लेवेला। निगम रा आयुक्त अभिषेक सुराणा बतायो के स्वच्छ सर्वेक्षण-2024 मांय 'जागो जयपुर जगमग जयपुर' रा तहत नगर निगम जयपुर हैरिटेज री ओर ऊं स्वच्छता नारा अर पोस्टर बणावण, शुभंकर अर जिंगल होड़ राख्यी जा रही है। इण मांय जनता 31 मार्च ताई नगर निगम जयपुर, हैरिटेज री वेबसाईट माथे गूगल फॉर्म रे जरिये राय दे सके है। ई रे अलावा क्यू.आर. कोड रे मार्फत ई आं होड़ां मांय सिरकत करी जा सके है। सुराणा बतायो के न्यारा-न्यारा सोशल मीडिया प्लेटफॉर्म रे मार्फत ई आं होड़ां ने बधावो दियो जावेला।

000

राज्य मांय काल नुवा पश्चिमी विक्षोभ रा असर ऊं मौसम मांय बदलाव रा आसार है। मौसम विभाग रे मुजब ई रा असर ऊं दो दिन ताई कोटा, भरतपुर, अजमेर, जयपुर, जोधपुर अर बीकानेर संभाग मांय कटे-कटे बिरखा रा आसार है। ई बीचे प्रदेश मांय आवता 24 घंटां मांय अधिकतम तापमान मांय एक ऊं दो डिग्री सेल्सियस री गिरावट व्हेवण अर आवता 2-3 दिन मांय राज्य रा घणखर हलकां मांय अधिकतम तापमान 40 डिग्री सेल्सियस ऊं नीचे दर्ज व्हेवण री संभावना है। आवता 24 घंटां मांय राज्य रा घणखर हलकां मांय तेज बायरो बाजण रा आसार ई है।

000

राष्ट्रीय परीक्षा एजेंसी ई साल री संयुक्त प्रवेश परीक्षा-जेईई मेन्स रा दूजा सत्र मांय इम्तिहान देवण वाळां ने वां रा परीक्षा केंद्र रा शहर री सूचना जारी कर दीनी है। जेईई-मेन्स रा दूजा सत्र मांय चार ऊं 12 अप्रैल ताई 319 शहरां रा न्यारा-न्यारा केन्द्रां माथे इम्तिहान लियो जावेला। आं मांय 22 शहर दूजा देशां मांय है।

000